



PREDMET: Obavijest o zakonskoj obavezi naplate i uplate boravišne takse, kaznenim odredbama i uvođenju besplatnog digitalnog sistema „Prijava.ba“

Poštovani pružaoci usluga smještaja,

Turistička zajednica Zeničko-dobojskog kantona (TZ ZDK) ovim putem upućuje službenu obavijest svim pravnim i fizičkim licima koja registrovano pružaju usluge smještaja na području Zeničko-dobojskog kantona. Cilj ovog dopisa je pravovremeno informisanje, usklađivanje poslovanja sa važećim propisima te modernizacija rada kroz uvođenje novih digitalnih alata.

U nastavku Vam dostavljamo detaljne i ključne informacije podijeljene u dvije cjeline: zakonske obaveze vezane za boravišnu taksu i uvođenje napredne web platforme za prijavu gostiju.

OBAVEZA NAPLATE, UPLATE I KAZNE NE ODREDBE ZA BORAVIŠNU TAKSU

Shodno **Zakonu o turizmu Zeničko-dobojskog kantona** (“**Službene novine Zeničko-dobojskog kantona**”, broj: 12/22), boravišna taksa predstavlja zakonski definisana namjenska sredstva koja pripadaju sistemu turizma. Ova sredstva se direktno usmjeravaju u razvoj, promociju i unapređenje turističke ponude, te poboljšanje lokalne infrastrukture od koje korist imaju svi subjekti u turizmu.

Molimo Vas da obratite posebnu pažnju na sljedeće zakonske odredbe:

1. Kome se naplaćuje i visina boravišne takse (Član 74. i Član 103.)

- **Definicija:** Boravišnu taksu plaća svako domaće ili strano lice koje izvan svog prebivališta koristi usluge smještaja u smještajnom objektu u kojem se obavlja turistička ili ugostiteljska djelatnost.
- **Način naplate:** Lice plaća boravišnu taksu za svako ostvareno noćenje, po dolasku u smještajni objekat.
- **Trenutni iznos:** Do donošenja konačne odluke Vlade o visini boravišne takse, ona se na području Kantona obračunava, naplaćuje i uplaćuje u fiksnom iznosu od **2,00 KM po noćenju**.

2. Kategorije sa olakšicama i oslobađanjem od plaćanja

U skladu sa opštim propisima i standardima, određene kategorije gostiju ostvaruju pravo na olakšice ili su potpuno oslobođene plaćanja boravišne takse (npr. djeca do određene dobi, lica sa stopostotnim invaliditetom, učenici i studenti na ekskurzijama i sl) što je jasno definisao **Član 75.**

(Oslobađanja od obaveze plaćanja boravišne takse)

(1) Boravišnu taksu ne plaćaju:

- a) djeca do 12 godina starosti;
- b) lica sa teškim čulnim i tjelesnim smetnjama (slijepi, gluhi, distrofičari i dr.);
- c) lica upućena na banjska i klimatska liječenja, odnosno specijalizovanu rehabilitaciju od nadležne ljekarske komisije;
- d) lica koja obavljaju sezonske poslove sa prijavljenim boravkom u turističkom mjestu;
- e) lica koja neprekidno borave u objektu za smještaj duže od 30 dana;
- f) učesnici školskih ekskurzija, odnosno učenici i studenti čiji boravak organizuju škole i fakulteti u okviru redovnih odgojno-obrazovnih programa, održavanja sportskih i kulturnih manifestacija;
- g) strani državljani koji su po međunarodnim konvencijama i sporazumima oslobođeni plaćanja taksi;
- h) strani državljani koji organizirano, preko zvaničnih humanitarnih organizacija, dolaze radi pružanja humanitarne pomoći.

(2) Lica iz stava (1) ovog člana ne plaćaju boravišnu taksu ako podnesu dokaz o ispunjavanju uslova utvrđenih u ovom stavu (odgovarajuća isprava, potvrda, članska karta, potvrda škole, ljekara, ljekarski uput, ugovor o radu i dr.).

(3) Boravišnu taksu umanjenu za 50% plaćaju lica od 12 do 18 godina starosti ako podnesu dokaz o ispunjavanju uslova (odgovarajuća isprava i sl.).

3. Način plaćanja i rokovi (Član 76. i Član 80.)

- **Odgovornost:** Naplatu boravišne takse vrši pravno ili fizičko lice koje pruža usluge smještaja, istovremeno sa naplatom same usluge smještaja.
- **Finansijski teret:** Ako davalac usluge propusti naplatiti boravišnu taksu od gosta, **dužan je na svoj teret uplatiti iznos** nenaplaćene takse.
- **Rok za uplatu:** Sva prikupljena sredstva od boravišne takse moraju se uplatiti na depozitni račun budžeta Kantona (Ministarstva za privredu ZDK) **najkasnije do 5. u mjesecu za protekli mjesec.**

4. Kaznene odredbe i inspeksijski nadzor (Članovi 92. do 98.)

U narednom periodu nadležne inspekcije će provoditi intenzivne terenske kontrole. Zakon predviđa izuzetno visoke novčane kazne za neispunjavanje ovih obaveza (nenaplaćivanje takse ili neuplaćivanje na račun Ministarstva za privredu ZDK):

- (1) Novčanom kaznom od 3.000,00 KM do 10.000,00 KM kaznit će se za prekršaj pravno lice koje pruža usluge smještaja, ako:
 - a) ne naplati boravišnu taksu istovremeno sa naplatom usluge (član 76. stav (4));
 - b) u računu posebno ne iskaže iznos boravišne takse ili ne navede osnov oslobađanja od njenog plaćanja (član 77. stav (1));
 - c) ne vodi ili netačno vodi evidenciju o uplaćenju boravišnoj taksi (član 77. stav (2));
 - d) u propisanom roku ne podnese nadležnom organu izvještaj o broju korisnika usluge smještaja i iznosu naplaćene boravišne takse (član 77. stav (3));
 - e) ne vrši prijavu i odjavu turista na propisan način (član 78. stav (1));
 - f) sredstva od naplaćene boravišne takse ne uplati u propisanom roku (član 80. stav (2) i (3)).
- (2) Za prekršaj iz stava (1) ovog člana kaznit će se odgovorno lice u pravnom licu novčanom kaznom od 500,00 KM do 2.500,00 KM.
- (3) Za prekršaj iz stava (1) ovog člana kaznit će se fizičko lice koje pruža usluge smještaja novčanom kaznom od 2.000,00 KM do 5.000,00 KM. (član 98)

(U prilogu ovog dopisa nalazi se detaljno Uputstvo za uplatu boravišne takse sa brojevima računa i vrsta prihoda).

DIGITALNA TRANSFORMACIJA – WEB PORTAL „PRIJAVA.BA“

Kako bismo Vam maksimalno olakšali ispunjavanje gore navedenih zakonskih obaveza i spriječili eventualne greške pri obračunu, sa zadovoljstvom Vas obavještavamo o uvođenju modernog digitalnog sistema.

Federalno ministarstvo okoliša i turizma, u saradnji sa Evropskom unijom i Saveznim ministarstvom za ekonomsku saradnju i razvoj Njemačke (BMZ), kroz inicijativu za razvoj privatnog sektora u BiH (EU4PSD) koju provodi GIZ, radi na uvođenju web aplikacije „**prijava.ba**“ u svim kantonima FBiH.

Turistička zajednica Zeničko-dobojskog kantona je potpisala ugovor o saradnji i u **potpunosti osigurala licencu za korištenje ovog sistema, čime je omogućeno BESPLATNO korištenje aplikacije za sve smještajne kapacitete na području ZDK.**

Prednosti korištenja portala „prijava.ba“ za iznajmljivače:

- **Brzina i jednostavnost:** Drastično ubrzava proces prijave i odjave gostiju.
- **Automatski obračun:** Sistem vrši **automatsku kalkulaciju boravišne takse**, precizno računajući ko ima olakšice, a ko ne.
- **Statistika u realnom vremenu:** Pruža Vam uvid u detaljne podatke o popunjenosti, što pomaže u planiranju i analizi Vašeg poslovanja.

Kako se registrovati za besplatno korištenje?

Kako bismo kreirali Vaš korisnički nalog i omogućili Vam pristup sistemu, potrebno je da na našu e-mail adresu dostavite sljedeće podatke:

1. Naziv subjekta*
2. Adresa i mjesto*
3. ID broj*
4. Smještajna kategorija* (hotel, motel, hostel, kuća za odmor, stan, studio apartman, planinarski dom i sl.)
5. Broj zvjezdica
6. Kontakt osoba*
7. Kontakt podaci (Telefon*, E-mail*, Web stranica, Logo/Slika objekta)
8. Informacija o plaćanju paušalne takse (samo za fizička lica/iznajmljivače)*
9. Tehnički kapacitet (Broj soba, broj ležaja, broj apartmana)

**Napomena: Polja označena zvjezdicom su obavezna.*

(U prilogu ovog dopisa dostavljamo Vam detaljno Korisničko uputstvo za portal prijava.ba kako biste se upoznali sa radom platforme).

ZAKLJUČAK

Ukoliko već redovno i uredno izvršavate svoje zakonske obaveze, koristimo ovu priliku da Vam iskreno zahvalimo na profesionalnom i odgovornom pristupu. U suprotnom, apelujemo na sve subjekte koji još uvijek nisu uskladili svoje poslovanje sa Zakonom da hitno pristupe pravilnoj naplati i uplati boravišne takse prema Ministarstvu, kako bi izbjegli rigorozne zakonske kazne.

Kao odličnu podršku u procesu prijave i odjave gostiju, srdačno Vam preporučujemo da iskoristite prednosti besplatnog sistema „prijava.ba“ kao modernog alata koji Vam može značajno olakšati poslovanje i automatizovati dio administracije.

Turistička zajednica Zeničko-dobojskog kantona Vam stoji na raspolaganju za svu potrebnu tehničku podršku, pojašnjenja i partnersku saradnju.

Direktor



Saban Ibrišimović

